

香

宇

集

刻田子庚申稿敘

夷陵馮澤撰

嘉靖戊午秋予爲杭郡博士識田子子藝於諸生中
見其才雄氣邁學邃思竒且得其所著老子指玄香
宇初集及自甲寅後編年諸稿讀之恍乎如飢渴之
後餐靈膏飲瑞露美動胸腋而不忍釋手也既而子
藝應辟命遊南都纂修浙江通志竣事言旋予又獲
覩其庚申之作乃歎而書其卷曰甚矣子藝之能言
也其性成乎抑習以致之乎抑豈秉長庚之精受白
申之學而得之乎何其炳炳琅琅隨事感遇馳騁乎

謫僊之間而不失三百篇之微旨也又何啻若遼之
凡昇之矢動中穀會逾久而逾熟也予楚人也觀三
峽之狂瀾與三湘之浩瀚每爲之震蕩心目今不意
湘峽之勢忽傾倒於子藝之筆端也嘗聞人有三尸
者恒以庚申日言人之過於帝今庚歲也彼三尸獨
不能於帝前一言子藝之美而使之少伸其所志耶
予三禩於茲爰重侯芭之誼郡齋清暇對客披閱悠
然忘倦客曰子之愛子藝似矣然才美而未第非命
乎予曰子藝年方三十有七其第不第固未可期然
古有之曰一第溷元子爾予於子藝也亦云然

香宇續集

庚申稿

吳越間田藝蘅撰

文

遊石湖楞伽山記

太湖山吳江入海出吳江西去卽通太湖天水茫茫一望無際周廣三萬六千頃其中浮峰七十有二而山之旁岍者不與焉在禹貢曰震澤在周禮曰具區在左傳曰笠澤在史記曰五湖所謂五湖者張勃云周行五百里虞仲翔云東西南北水凡五道陸龜蒙云上稟咸池五車之氣然皆無定考也今湖中大者

名亦有五曰菱湖

非湖州之菱湖

曰莫湖曰游湖曰貢湖曰

胥湖而其外又有小湖三曰梅梁曰金鼎曰東臯若

宜興之滆湖吳縣之石湖則又其旁之最小者也石

湖在太湖東北隅東風揚帆頃刻可至云是范蠡乘

舟入五湖故道而小椒杜圻諸山則蠡之所嘗遊也

于是櫂舟楞伽山下迤邐而上苦無喬木可蔭楞伽

寺隋碑甚古轉眺望湖亭則俯仰觀察五湖全體具

露回視扁舟破浪而來不覺此身凌風迥出于霄漢

之表也還煮茶于上方寶積僧房循支徑而北爲郊

臺蓋吳王偕祀處平坦尚可刻席百方其下爲治平

寺有井亦稱第四泉然不甚佳出而瀕湖有亭翬然
卽石湖亭亭近行春橋橋通越來溪溪上酒城在焉
越來溪者勾踐破吳入兵便道也酒城者夫差醞釀
之府也頽然花笑酣然鳥啼非昔日之醉鄉乎草木
旂常風雲輦輅非昔日之郊祀乎酸風卷波淒雨滿
城非敵國騁而宗祚覆者乎落紅亂飛逝水不返非
謀臣亡而妖姬遯者乎吳邪越邪兩安在邪漁家之
火對眠寒山之鐘到枕欠伸篷底誠一夢耳伯王興
亡大畧古今幾感慨矣故君子必觀太湖而後知石
湖之窄也必觀滄海而後知太湖之隘也不登縹緲

不經集卷之四十五
峰不足以見支硎之小不登崑崙山不足以見縹緲
之卑彼介然一隅竊勺水拳石以自多者吳越而降
踵接也得非并包六合達觀四海之度有未廓邪不
然何藩籬之不廣也噫積小以高大自博而歸約惟
學亦有然者豈直遊覽云乎哉

祭大中丞唐公文

爲巡按

作

唯公才雄南國望屬蒼生或出或處爲時重輕文冠
義魁職居清要詞藻綸聲華廊廟蚤歸田里長往
江湖卉衣草屨泥跡泥塗講席天開學笈雲集北斗
泰山三千七十文經武畧所養益深老成練達簡在

帝心拔起兵曹歷試郎署鎖鑰北門忠悃三疏再使
海上董我元戎銀臺旋顯執法俄崇開府淮揚東南
重鎮德共春涵威同霆震勞心師旅食少事煩營中
星殞三軍喪竟某也奉命南巡實資碩畫哀計遙臨
曷勝痛惜辦香束帛遺奠陳詞英靈卓犖神其格思
跋趙孟頫二馬圖

子昂所畫二馬其一毛膚肥澤志在豐草奴隸騎之
不爲下且齧且鞭將驅之入于水其一骨多而神精
四蹄拂天萬尾掃塵昂首長鳴矯焉如龍而追風逐
電之材溢于意表奚奴遠視鞮鞞不能加若爲之色

沮而氣死者吁奇哉驥矣仲尼遇之雖未必信其德
能不以材稱乎

餘杭李氏方山墓碑記

代作

吾鄉平原廣陌中有山臨溪巋然獨立端然而正峙
者曰方山堪輿家所稱金印山者是也脈從北來瀕
水而止其陽爲順龍李氏八世祖之墓在焉其陰爲
逆龍則余六世祖之玄臺也李氏系出故宋忠定公
蓋公嘗提舉洞霄宮其第七子秀之占籍餘杭遂世
爲靈源鄉人卽今福建江西志譜所載甚悉自復庵
公八傳而爲樂逸公實始葬于方山其祔而左者九

世祖菊軒公也祔而右者槐坡公竹隱公東隱公也昭穆有辨陟降有級祭掃有田竹木有章歷二百餘年與余瑩松楸南北蒼蒼相望吁何其盛哉且李氏多才子弟衣冠接武咸能恪守家法而恢弘其祖構故其丘隴祠宇翼翼然無少廢墜間有一二干紀者其宗子率能以其宗法繩之無思不服况得賢族如何公勵名節首風化表章先賢垂情後裔近因李生焯之請慨然爲之立約以著憲嚴禁以示懲崇封以式墳公之愛何殷而其禮何隆也于是焯感公之惠深及幽明謂不可以沒善用題貞石以永嘉澤以箴

後世廼謁田子記之惟田與李代締姻契而田子薄
遊八閩時李生適以通譜至會晤行部實詳顛末今
復能長族政績前烈排群議而振家聲斯固亢宗之
子也矣忠定之嗣庶其有聞乎哉銘曰生而樂死而
逸達哉斯人萬事畢鬱鬱葱葱蔭廟室宜爾子孫永
逢吉忠臣有作孝有述百千萬年詔名筆

教授陳先生墓志銘

嗚呼此大明恕齋陳先生之墓也先生諱嘉賓字子
敬姓陳氏其先山陰人宋德祐間鄉進士撫州同知
恒齋公始徙餘杭遂世占安樂鄉籍國初有宗禮

者經明行修嘗爲本縣儒學教諭曾祖冀祖豫皇伯
考邦鄉進士 崇王府審理皇考瑤皇妣蔣氏實生
先生瑤字克用明春秋領本縣歲貢爲廣東惠州府
儒學訓導陞福建建寧府浦城縣學教諭卒于任先
生學諭公第三子也先生生而穎敏幼善屬文弱冠
補學官弟子員食稟餼嘉靖辛卯應選貢 詔就廷
試得與 御覽先生年甫三十也居京師人咸愛先
生年少勸之卒業成均先生顧喟然嘆曰嗟乎古之
人有奉檄而喜者吾竊慕之吾母老無以爲養吾可
薄吾世守之官而獨不屑爲邪遂就直隸寧國府儒

學訓導陞江西南康府建昌縣學教諭終直隸鳳陽
府學教授後先二十年恪守一官以身率士兼盡君
師之責于是膺撫巡薦獎者凡十有九舉率多美辭
固未易更僕數廼今列之名公大夫旌異傳及行狀
者足徵其不誣也先生在寧國時同寮河南望君者
主僕在任不數月病卒俸資未入囊橐如洗先生竭
力治喪如同胞之戚朝夕泣奠久之其孤來奔且厚
助而歸之其孤感先生恩抵家以木爲主識先生名
氏焚香生禮及後居鳳陽有某丞至乃望君同鄉人
一日與先生並轡出中都談及是事且深嘆其厚德

以爲不及見是人也與先生接語久廼知其爲先生
即下車匍匐拜道左再四稽首曰平日聞風尚愛敬
不置今何幸面覲邪行路傳頌以爲真盛德事先生
在建昌建昌文風未純士習未雅先生一變至道上
下化之及去相與立碑紀蹟舉而祀之名宦祠中先
生之在鳳陽也其仲兄嘉善公養母於家聞訃即日
奔喪治葬廬墓罔不盡禮服闋就選銓曹銓曹索先
生金先生無金且曰吾生平惟束書起家今書且敝
不堪束矣又安得金于是竟忤銓曹卒以老疾罷職
不敘先生慨然拂袖南歸時人爲之語曰誰謂天有

官有官今無天蓋傷之也居無何冢宰建陽李公應召赴闕道經餘杭李公往在寧國固與先生交善于是謁先生見之見先生年纔五十髮尚黑貌偉體強健初無恙因太息慰之曰先生之年禮始服官政諸生當先生年方且就試有司也先生安得老疾天官又安得以老疾廢先生乎先生第安之吾行且屈先生起矣先生顧力謝絕之長揖而退優游林泉詩酒自娛可謂賢達君子矣先生事母孝事兄敬養無子之姑與其伯兄無母之孤子三十年有亡共之撫仲兄之二女長而嫁之悉如己出此皆末世薄俗所

罕有者先生素寡疾方與徐子奕夜分無疾而終嘉靖己未秋八月十五日也距其生弘治壬戌冬十一月六日享年五十有八配陸氏男子一曰袞縣學生孫男子一孫女子二俱幼袞卜以庚申冬十二月十一日葬先生于馬鞍山之原嗚呼公道泯而私謚不彰私謚不彰而玄德不足以軌世漢有陳先生寔者門人謚之曰文範唐有孟先生郊者友人謚之曰貞曜先生之碩德有如仲弓先生之介節有如東野合二謚以旌之夫誰曰不宜今祇稱之曰恕齋先生者從其所自號也嗚呼悲哉是不媿于吾銘矣銘曰世

業儒爲經師廿載三遷止一司造士作人輔明時老
而退公方艾疾而汰公自泰爲貧而仕貧罷官吁嗟
世道何其難種德食報後嗣延馬鞍之丘公永安

祭范宗師夫人文

爲三學師生作

民生于三事之如一曰義與恩兩不可失惟我夫子
表率一方亦惟夫人母儀頡頏職佐綱常心勞內助
陰教克敦慈範益著化行南國暮年有成 寵命荐
被翟茀載榮霜飛玉堂婺女殞曜凡女有行餘光孰
照遺我子弟匍匐孔皇孰撫孰字淚雨如滂東王在
芻縮酒在絮母愛師恩悲不能去

原缺

壯邑之難治也有曰恭而敬可以振勇寬而正可以
懷強愛而恕可以容困溫而斷可以抑奸恭寬溫愛
言乎端凝之度公平之體也敬正恕斷言乎通敏之
才條理之智也振勇抑奸非勅獎以勝繁劇者乎懷
強容困非宜民以稱循良者乎蒲之三善何侯備之
矣况侯之爲治率先學校啓聖有祠不得其地則遷
之興賢育才有坊廢而未樹則更新之嚴考課以求
俊英隆衣冠以平徭役可謂豈弟作人者則其求福
不回也謂非自然者哉科道之旌之也固爲盛典而
爾師生之賀之也亦非貌敬矣余不佞服科道知人

之審而慶侯之足以表百城而膺雙獎也故特叙其
大都如此若夫侯之弘才碩度嘉政令舉則觀四方
之風者自能采之以需 國史之錄余又夫何言哉
書吹簫引鳳圖後

鳳皇瑞鳥也朝啄琅玕夕飲清流曾何樂乎人間世
之簫聲也彼簫管所吹何豔辭也而能致之邪彼弄
玉何物妖女子也而能跨之邪夫神僊之變化其飛
騰乎宇宙如風斯飄初無其聲如雲斯翔初無其形
今必假于乘鸞而駕鶴焉則是神僊弗靈于禽獸而
而禽獸反靈于神僊矣斯鳳也雖謂之妖鳥可也楚

狂曰鳳兮鳳兮何德之衰其諸巢阿鳴岐之後者乎

食河豚說

余十餘歲時遊吳中見怪魚滿市以其無鱗頰腹充
怒氣狀甚醜惡不類吾鄉魚也問之牙人知其爲河
豚及能殺人也畏之而不敢視二十時又過吳中則
惡之而不復畏三十時往來吳中既熟且聞其風味
之美也則見而慕之矣前日惡之之心不復萌也今
又六七年旅寓毘陵見酒家案上纍纍貫列就而食
之者群然爭席心竊思之蓋不惟知所慕而且愛之
矣因微蔣子將買一斲染指子久驚訝趨而去之凡

數日間屢微屢趨竟不肯從余自是幾于垂涎一日
會薛君孔鄰招飲甫入門余笑謂曰今日嘉會非河
豚不可孔鄰乃亟市之召善爲厨者烹之頃焉則見
一少年厨卷雙袖操利刀如銀闊步壯視有奇氣余
顧衆客笑曰此郎爲厨吾輩性命可保無恙矣舉座
哄然絕倒行觴久之作羹始至客有畏心皆怯于箸
余獨大嚼索酒長飲意謂品在天庖大官之上頓不
覺其命之輕也肉甚美真異常鱗而其腹中腴號西
施乳者爲尤美凝如脂甘如飴白如肪玉實中饋之
珍聆茲嘉名其風味不言可想客言土人方春後三

五日即延頸以望河豚之來競市食之以賞時物率以爲常未見有他害者又言其毒專在于子與血而皮油眼皆當弃者故諺稱油麻子脹眼猜酸云然其油熬之極熟可以發火則食之亦不麻其子如粟以水浸之顆大如小菰豆經宿漸如芡實彈丸食之少生即殺人今以紅麴塗之煮極熟則亦不復脹惟皮蠹眼惡固未有食之者治法在去血之淨烹調之熟和之以荻芽搽之以姜絲則五味適矣土人初治時尚置釜于露天甚慎且潔恐梁塵之汚爲尤毒也今則漸諳如常膳治之不復更措慮又言中其毒須

飲不潔解之今亦不必用治法以龍腦浸水或至寶丹或橄欖蘆根汁萋蒿菰菜皆可解又法用槐花微炒與乾燕支搗粉水調灌之但食河魴者當日不可飲荊芥烏頭附子湯藥誤飲必殺人耳又言一士大夫不敢食河豚反惡其子之好食無厭也諭之不止則拍案大叫曰譬如天不生此魚何苦食之其子含哺長跪報曰譬如天不生此身何苦不食之土人遂傳以爲笑話云故在昔張文潛有云河豚水族之奇味蘇子瞻亦云也直那一死信不謬也薄暮別去臥于篷窗底靜而思之乃喟然嘆曰嗟乎嗜慾之害溺

人也有如是哉方余之始而長繼而惡終而慕且愛之也良心漸喪而情實日開膽氣既粗而忽自忘其操守之日弛矣夫以人之有身雖賤且貧未有不重其生者死重于泰山固非賤貧者之所敢望輕其死于鴻毛又豈余之所忍邪今以六尺之軀而試一指之味以一朝之慾而捐百年之事業嗚呼何其愚也況由此觀之則生平之毒湯于河豚而不足畏者又不知輕身以冒之者凡幾矣可不悔哉可不痛哉遂著爲說以垂子孫口腹之戒

處士張公墓志銘

廐士後山張公以嘉靖三十二年三月三十日卒既
葬于風篁嶺幾十年矣未克志錢塘田藝蘅曰嗚呼
我外舅古君子也法宜銘而于諸女夫中獨子我是
又不可不爲之銘也按張氏仁和義和里人曾祖翔
翺生鵬鵬生綸綸事具載先武思繩集大學士張洲
王公鑿爲之志諭德寧波豐公熙爲之表尚書錢塘
洪公鐘爲之贊者也綸室洪氏以弘治二年三月二
十三日生公諱應祥字元正其貌清而臞其髯修其
質直而厚角巾博帶聳軀昂步迥出市夫表幼讀書
壯業絨政機杼經緯種種精好玄黃采錯充棟盈車

一登其堂粲然奪目如入名園而千花爛熳也如遊
紫府而雲霞繽紛也蓋杭本都會冰絲所產而行人
多好僞率油粉其絲以欺遠商圖多罔利卽難售公
命匠作惟熟其練而純之獨不得加油粉水清而色
深以故值不加昂而生活卽易售又反多獲利三倍
他行遂以錦綺綦組名其家喜與豪士賢大夫遊而
時之賢豪士大夫亦喜與之遊城市之善爲遊者率
之西湖而公顧厭其華也所居之後小山來崇隱隱
隆隆涌起塵中如駝紫峯如驥肉駿蜿蜒如龍環抱
公宮如封如墉曰匾擔嶺蓋吳山南來秀脉之所鍾

也公乃夷其巔石其闌有磴盤盤有堂閒閒有梨有
榴有橘班班雜時其間公有嘉賓方袍魏冠瑜珥瑤
環有觴有歌絲竹嬋娟傲于考槃于是翰林金公美
之大叅吳公維新結生平歡拙思灑翰爲記爲賦以
表後山並揭其顏公甚樂之因自號焉承順父母獨
以孝著洪性嚴毅諸子婦雖甚虔鮮克當意而公與
其室華孺人事之卒不違其志諸弟隱顯剛柔不齊
公獨坦夷推讓遺貲弗攘弗私終身怡怡訓誨三子
或賈或儒稼穡詩書森森庭除映玉聯珠其季子溥
庚子鄉試中式公心孔愉旣而華孺人卒公乃曰余

老欲傳矣孫子繁庶可析其居且鰥倦于勤毋或勞
余孟子淳適居山堂養志不遑後山右方有耆兒山
者倍厥高岡黃耆嬰兒厥兆孔祥乃斐乃築乃構雲
廊飛樓曲房奉公翱翔後山之勝至是益彰公用正
寢含笑而亡此皆我公敦倫之大都也若夫秉義賙
艱雖捐數千金不恡則固公之天性樂施然也用是
與物無競迨老足跡不履公庭謂之聖世之良士非
耶惟我華母實內相之故克成公之志也子男子女
子凡八人孫男子八人孫女子八人曾孫男子女子
凡八人嗚呼何其子姓之振振乎吾聞張之故長老

有言翱字阜羽精象緯術數之學得吉地于佛牙塢
且識之曰葬百年後子孫昌茂富貴縣遠云乃今歲
時伏臘則銀黃立組纍纍然垂冠蓋車騎相望于道
不絕嗚呼又何其昌茂縣遠之若是也至是仲子淵
又得二吉兆于龍泓山左右欣然色喜曰吾將奉以
寧吾二親之體魄也于是以北原葬公而分葬母孀
于南原西去可數百步銘曰維昔豪士起販繒文采
千匹太史稱鳴珂三戟雲龍蒸矧曰素封寶靈承佛
牙之識久而徵龍井新阡鼎嗣興歷千百世證斯銘

茗溪銘

有序

田子家于茗溪之東去溪可四五里而北遶以瀾五
湖其分流則達于田子之門茗本作芳說文葦茗曰
芳葦茗曰茶禮記作蒻疏云萑茗葦即蘆一名段萑
即萩一名萑蒹亂字書于芳別出茗字以爲曰陵茗
曰凌霄曰鼠尾曰翹饒皆相類之種但有長短麤細
強弱老少之別耳蓋卽今所作茗帶者以其抽條搖
遠生華而無萼萼故曰茗華又茗茗高貌今溪流發
源天目勢甚高遠謂之茗溪亦宜故君子見茗葦則
當思掃除不潔臨高而泛遠則當思立已制行之不
可以卑而近鑑于朝盈而夕涸則當思有本之學餘

謠云茗溪兩岸是蘆花朝見波清暮見沙蘆花朝見波清暮見沙慮其決隄傾壑而不知止則當思痛而溢之戒究源及委自山入海則當思終身會歸之極于是乎銘之銘曰茗溪之橫流可以放吾舟茗溪之流竭猶可以濟筏飲之游之清且漣漪茗之華矣偏其反而天月之上渤澥之下逝者如斯不舍晝夜夜見沙石書見波濤進銳退速魚龍易逃萬淵千谿蟻決衡折思患豫防禍源乃絕知者樂水田子是遇濯纓濯足滄浪匹皁

求富貴箴

客謂田子曰子亦欲富貴乎田子曰異哉客之言也

富與貴人之所欲田子亦人耳何獨厭富貴而樂貧
賤哉曰然則吾子欲富貴而卒不富且貴者何也曰
愚哉客之言也吾聞得失有命富貴在天求之不可
戒乎執鞭今客必欲田子之乞哀昏夜以求名利之
兼全矣乎曰是不然上古之時有天有命惟今之時
人司其柄求則得之不求則病以諂佞爲文章以邪
媚爲德行財不必仁仕不必政逐勢乘時乃爲賢聖
故諺有之能拾路矢其富無比能呵陰囊其貴非常
是以賢者合人情知者識世務和光同塵無射無惡
今子亦名利之是趨而不能改子之故步吾見其必

困約以終身而榮華徒切于思慕也子乃以我爲愚
我實以子爲固矣田子喟然歎曰嗟乎有如客言則
世之好富貴者一至于此哉吾聞君子立身能擇能
守貧賤其常我則順受富貴浮雲可無可有路矢將
拾必污我手陰囊將呵必臭我口縱使爵超上台金
過北斗殆有甚于乞哀不如猪狗此蓋小人之所甘
而實君子之所醜也子何居心之穢而發言之陋乎
故君子所貴惟道是謀知命不惑樂天不憂仰無所
怨俯無所尤貧與富埒賤與貴侔道充德積不忤不
求何榮何辱生順死休若夫屈膝奴前低頭僕下妻

妾墻間襟裾牛馬雖得意于一時終貽笑于來者與其富貴而生焉毋寧貧賤而死也

古今禽獸小人說

田子曰古之禽獸今之小人也今之小人古之禽獸也或曰何謂也曰上古之世盈宇宙間皆山澤草木也虎豹龍蛇生焉天地之戾氣有所歸着故小人少後世生齒日繁田不足而耕其山沼不足而渴其澤棟宇芻蕘之不足而濯濯其中木雞驚之不足而剖鶴鵠犬豕之不足而食虎豹魚鼈之不足而醢龍蛇盈宇宙皆人也則天地之戾氣又安得不歸着乎人

哉故今之小人多也曰然則將如之何曰與其小人
也寧多禽獸禽獸與我異類也猶可除也小人則我
同類者難乎其爲辨矣亦難乎其爲遠矣曰聖人在
上獨何如曰聖人亦以禽獸待小人耳不可以誅滅
盡也格之而已矣化之而已矣其終不能感而變焉
者驅而放之可也戮之可也故君子懼焉不敢佚德
以自近于禽獸

香字續集

庚申稿

吳越間田藝蘅撰

詩

元日立春

百歲難逢正旦春
田家樂事屬芳辰
卽看煖氣如三月
便覺韶光浹四鄰
金勝彩幡同闔巧
椒花菜甲競回辛
翻思作客常伸欠
莫厭蘭心勸酒頻

春正音政詩中正月之正無音征者
志倦則欠體疲則伸見禮記

四日彭新城子豫枉駕郊居留宿有贈

東郊晴色動芳塵
百里何緣枉畫輪
結駟孰憐原憲

病掃門不弁長卿貧一鉤坐見梅花月萬斛歡傾竹
葉春曾說吳民能易感爭歌賢令得彭循

燕集餘杭何侯公署奉謝兼簡駱盛兩進士

東閣梅花何水曹新詩嘉政總風騷放衙過午無公
事下榻逢春有譽髦門映古溪清似鑑麥抽微雨潤
如膏鹿鳴旣醉難爲報願頌甘棠效袞褒

杉青閘往年倭變戰敗之地

春草不青雲覆渚云是當年陣亡處夜深風雨暗孤
舟沙上鶻腰啐啐語

仲春朔日吳江道中揚帆經姑蘇死亭灣乃漢

朱買臣妻自沈處感而有作

去年此日萬山中無數桃花笑曉風今年此日三江
裏惟見蒹葭映晚空登臨已自成奇癖著作何由副
上公幸有行歌負薪婦白頭應不棄貧窮

重登虎丘觀劍池由悟石軒憇平遠堂同蔣子

久作

一度停舟一度登追尋况復共心朋直嫌自去花無
主道士重來鶴有徵亂石悟經頭盡點古池沈劍氣
常騰山前山後春多少詩在闌干第幾層

同詠一首

蔣灼

樓閣連山曲路通吳王曾此起廢宮其乘雙筱因春
暇唯見輕旂動午風白虎不來金穴散青龍欲合劍
池空僧房闌檻都如畫誰識興亡在眼中

館娃閣

豔閣藏春記昔年美人魚貫寵三千君王自得西施
後無復溪頭放采蓮

響屧廊

扁舟一泛曲廊空香板無聲夕照中滿地落花疑步
屧至今猶恨隔江風

泛石湖遊楞伽山坐望湖亭有懷

石湖春淨綠波平。遙日東風。雙槽鳴。不見施娘辭國處。徒聞吳子拜郊名。楞伽山路。松筠遶寶積。僧房鐘磬清。家在茗溪三百里。桃花柳葉倍含情。

登吳王郊臺

橫山峙荒丘。上有樵牧路。云是拜郊臺。吳王在時作。周室弛弘綱。諸侯犯王度。遂使荆蠻人。僭禮干天步。封土擬園方。法駕侈冕輅。神明豈降歆。祇以觸帝怒。館娃不能居。酒城不得固。越兵溪上來。頃刻覆宗祚。爾祖有至德。天位且不顧。剪髮文厥身。化俗敢逸娛。血食期世延。胡然不思悟。自夷千載基。遺黎泣行露。

當時遊麋鹿今日穴狐兔野燒驚燔柴林鳥疑韶頀
震風欲興靈巖日將暮吊古有餘懷裴徊不忍賦
走狗塘

日落長洲苑風生走狗塘誰教唇齒國竟作魏盧亡
望亭贈別童張二使君謁選銓曹

關津一見布帆輕羨爾同舟上玉京秉燭豈堪談往
事舉杯時復道親情野人奉檄徒羈旅天子掄材
正聖明別後要知相憶處春風綠樹有啼鶯

寄內

怪儂輕別離別離又春月孤棹入五湖怕殺風波濶

他鄉無好景桃李少顏色驟雨勒餘寒庭花料遲發
此情爾當知歸來兩相說

食河豚有感

二月春風蘆笋抽河鮑欲上水平洲主人特買供金
鼎狂客初嘗廢玉羞饒口飽餐真自得驚心猛悔獨
何求敢夸知味翻拚死垂戒還思嗜慾憂諺云拚死
食河豚

西施乳有序

西施乳者河鮑腹中之脾也河鮑今日河豚
固其音之相近亦稱其肉之美如豚也博雅
云鰾鮪純也背青腹白觸物即怒其肝殺人

是也水鹹淡相交處產之肯葡萄著號千馬
乳綠橘狀異于牛妳動植齊致未足爲奇至
若石首尚太乙之糧江魷美西施之舌斯蓋
引類而興假譽而貴者眷此佳名能無新詠
乃于投箸之際口占十有二篇辭雖謝于典
雅若以比興律之則庶幾可以同飲矣秀色
可餐燕旨療飢惟易牙之口別焉

自別鵝夷伴水僞魚分比目恨重淵獨留冰玉雙雙

乳先上春風玳瑁筵

立春繞過水一津此魚即上水也

莫信逃名范蠡取具瓊肌瑤髓爲婢娟至今流落湖心

裏便欲移家逐網船

東海夫人孰比有西施舌好不論錢平章若配侯姬

乳始解江跳是在傳

東海夫人海蛭名也侯姬即鮓鮓音

馬酪羊酥氣味膾芳名猶自塞夷傳豚魚誰道無情物抱得西施兩乳鮮

莫指河豚是小鮮分明龍女上漁船酥胸剖出甜于蜜枉說傷生鱠少年

方丈徒夸食萬錢不須魚貫籠三千客中但得西施乳糲飯孤眠也自便

風流愛殺李三郎新剝雞頭軟更香可惜溫泉同浴

飛不留一點在滄浪

高年誰不羨張蒼爲有佳人乳作糧若使當時沾此
味飛昇知爾壽天長

曾遊玄圃見西王乞得蟠桃辟穀方今日自餐僊子

湮隱芝絳李似荒唐

隱芝絳李皆蟠桃乳法服之者僊

富貴富思嗜慾荒却將人乳作豚糧尊前祇觸君王
怒不及天生白玉肪

若耶溪上浣沙娘兩粒紅椒滿着漿何事却沈魚腹
裏不如殉葬在魚腸

謾詫駝麋玄玉漿八珍惟稱北人嘗江南風味誰堪

敵還讓西施詞子香

迤北八珍五口號乳麋八曰玄圭漿即馬奶子金詞子始稱也

路中見隔牆風折花枝

牆裏紅香若箇家春風忽折一枝花東君不是無情思要使遊人插髻丫

延陵阻雨寄訊鄭蕪湖

剖符聞爾率王畿墨綬銅章日有輝設教正乘春今出省耕應帶月明歸平蕪烟雨孤城遠新水江湖短權蓬獨寄梅花報岑寂隨陽心與鴈齊飛

客中春日

客裏可憐春獨行湖水濱青青盡烟草冉冉絕風塵

眼熟祇新柳面生無故人長吟歸去好何郭米全貧

哭天雨

去秋七月公而夭折今春二月天雨復
來客歸憫之不報情不能堪哭之以詩

初子前秋喪冷春又哭兒况歸泉下日正夢客中時
獨有傷心淚都爲初骨悲鍾情真我輩天道豈無知

出兵行

朝出青徐兵林山容美兵出兵防春汎豈日事窮征
征夫賒行裝憶氣何爭憚弓矢垂馬腹刀劍絡馬纓
繫馬當市間沽酒慰嚴程酒備見客至當壚稽首迎
三五據上席踞號四座驚瞋目呼美酒拍案索奇羹
上人何有能飲恨不出聲醉中雖狂言倭奴不足平

一市喧成雷樓榻爲之傾飲罷出門去不別主人行
主人討酒錢牽衣可憐情征夫方震怒火焰生雙睛
拔刀便砍頭猛虎孰敢攫妻女長跪告長官聽哀鳴
貧家之貲本度日難爲生乞求一兩錢淚與言辭并
醉客若固闌上馬催銅鉦得意出城郭街心啼孤惺
張子朴邀遊西湖因索同席

懷抱何時鮮因君樂山舒隔花呼画舫移席避香車
雨過山容潤煙銷柳眼疎年來歌舞地憂樂不同居
寒食哭葬天雨

珠擎玉立沐三年客夢歸來竟杳然何況西山寒食

雨淒涼送爾入黃泉

三月三日巳巳

風俗猶傳三月三采蘭聊傍綠溪潭偶逢上巳堪修

禊午過清明正護蠶

先一日清明吳鄉婦女用既有蠶子于枕席下名曰護蠶

羽觴追逸韻雖無絲竹且高談不須再學諸侯聘種
得桃花蔽草庵

歸自廬山訪田先生有贈

元慧

歸來錫杖自匡廬香宇清風再拜初別去更憐聲律
細相逢殊覺世情疎鶯啼穀雨開新茗燭剪春宵檢
舊書千里不忘喬梓念禪心詩況總真如

答贈月松上人兼寄訊東天目與山諸法侶

遙聞桂搭在天池路向東林又過西

東林西林
寺在廬山 慧遠

溪邊尋虎跡文殊洞裏伴猿啼近時僧臘心逾定到處軍持手自提傳得白蓮修淨社翻經臺有舊留題

雨中訪薄孝孚因與小集南埭村舍

十載心同跡尚睽方山只隔滾東西暮春風雨閉常掩野老棠榆路轉迷我欲漫遊三島外君行清望五雲齊晴和莫負薔薇約書畫船輕水滿溪

花竹闌干

六曲闌干花滿堂紫鴛七十二成行薔薇亂掩茶蘼

色玫瑰全侵芍藥香
揜舉春風斑竹架
平安夜雨白藤牀
繡屏翠幄常酣夢
絕勝佳人錦瑟旁

奉賀宮保胡相公一首

聖主臨軒寵命新
海濱從此淨風塵
喜回弦誦千村月
恩及耕桑萬國春
樽俎運籌非斧鉞
河山作誓有絲綸
表忠共仰生祠在
願效淮西蔡雅臣

三月晦日喜將子久薄孝亭立元夫來訪

九十韶華竟若何
春情心事兩蹉跎
不因嘉客三人至
忍使良辰一擲過
几席影鋪新綠淺
闌干香積落紅多
晚來風雨同舟去
夢繞方山碧樹柯

同詠一首

蔣灼

三月訪君逢小盡良朋還共惜芳菲却移席上玻璃
盞更對庭前錦繡幃暮雨忽催舟自發春風欲與客
爭歸綠陰明日方山滿須信花時此會稀

錦帶花二首

絲絲牽蔓引東風點綴花房十二紅若使芳心能束
縛合歡羅帶許誰同

貧病何消玉帶圍綉紳寶銓事全非青皇乞與山人
便腰綰花絲稱草衣

立夏讌集許氏園亭夜中聽彈琴留贈一首

六逸溪頭訪逸人茂林修竹可娛賓
庭鋪嫩綠初迎夏酒對飛紅正送春
玄度素風今領畧游品固癖久
沈淪抱琴他日扁舟過我亦高山
流水濱有竹溪曰六逸遺踪
方山醉歸舊內兄張子道自城中携酒來訪
主人不在草堂開開有佳賓載酒來湖上
繁華看欲盡山中寂寞首同回盤行珍饌
惟新符歌送妖童是落梅三宿未能酬
閒闊生憎杜宇隔林催

試花鬚

世人鬚髮稍斑白者稱曰花白余三十有七
鬚髯忽白一二塾戲名之曰試花鬚攬鏡微

吟不覺對笑

髮白吾真差

去聲爭差平

白到鬚試花雖異事結果或

同符忍把金鰓摘羞將寶剗塗苦吟終撚斷長笑問
妻孥

曉起焚香適薄孝孚送龍涎餅至簡謝一首

鹽沐才停坐清曉玄思超然度雲表
堯鑪宿火撥重
醒風引餘香玉絲裏故人解事素書來
遠寄龍涎十
八枚圓印驪珠蠻海出潤九蛟沫瘴煙開銀母錢輕
試新炷蕙氣蘭滋漲花霧麝臍多忌遜芳標雞舌徒
珍卻華步山林不可無寶薰急索苦茗澆幽芬裁詩

欲謝意縹緲散作湘簾翡翠紋

徐姊丈魯卿於甲辰年一乳二子乃今庚申又

喜雙生詩以賀之

是年吾鄉雙生者凡六家皆耳目所見亦奇事也

玉樹既同茁瓊枝復並萌昔曾夸四乳今又喜雙生

已勝徐卿子真爲魏氏甥森森後來秀况在弟兄情

蠶月

蠶正忙時葉正稀避人門戶插桃枝山村不用農桑
曆戴勝聲中布谷隨

贈何廷用臺察雙旌一首

翩翩二使出神京共表循良翊

聖明要識暮年成

治績原知先世有能聲
若溪一派通天漢
舟楫千尋壯海城
奉檄不材修外史
如君百里獨標名

夏日費氏百家園中作

百家園中李子黃
百家園中泉水香
煮茶未熟宿酒醒
高樹密葉生微涼
留下自昔有佳地
山北惟君多美莊
短棹夷猶白浪塢
連朝避暑共壺觴

墨葡萄

秋藤縱復橫
罌罌龍珠大
想見月明時
亂影階下坐

仲夏朔日小園見新月

聞西域有初一月者中國自來罕觀也

火輪猶未頽
微月忽西上
三日哉生明
先期遽成象

團扇一線規古鏡半痕朗弓繁弦未安梳挿髻深搶
玉兔毫初生丹桂枝年長街山似鎌飛當樓如瓦仰
造物不可度形容誰能做修竹起嫩涼小園欣獨往
藉石披煩襟臨風鼓吟掌悠悠適清虛稍稍蠲痛痒
廻塘既澄澈高林漸疏爽流螢無遠照鳴蟬有餘響
悟真覽玄機凌霄抱遐想暑退覺軀輕思越會心廣
安得塵外人于此共幽賞

夏雨

田家何事樂時雨過前村新水平苗眼肥泥壅草根
烽烟三歲息耕鑿百年存暑淨荷風起香生老瓦盆

七月二十七日大水

夜雨未決明皇天放聲哭平地成江海洪水湮陵谷
蛟蜃騰潛妖蚪螭闔孽族三鼓漸浸牀五更遽沈屋
牛馬趁浪翻老稚隨波逐身首裂石礮腎腸挂楂木
百里無人居一旦失山麓滔泊河漢傾刺刺乾坤覆
天地豈不仁芻狗同顯戮無乃發殺機龍蛇競起陸
相去僅只尺何忍觸吾目言之者心寒見之者額蹙
欲將一手援難挽溝壑內死者既塞淵生者仍枵腹
室家盡丘墟畎畝畝潔種稂孰謂嘉穀登忽爲茂草鞠
競痛今秋荒安望來春熟深悲穴嵒棲高憫託林宿

殆猶帝堯時
洛水壞四隩
奚策救焚溺
賑貸仰司牧
自從軍興來
聞鮮九年蓄
嗟吁涸轍鱗
哀鳴誠蔽蘇
欲待西江水
終須腐枯轂

白荷花

太液池中千葉蓮
水僊移種綠雲間
月明照見亭亭影
疑是蘇郎白玉環

答蔣時升琴操南薰見懷之作

南風秘曲若爲傳
俛仰重懷百代前
我且無絃乎久矣
君之古調也超然
阜財不到詩窮地
解慍安過醉
夢天能共此中求
絕響還來洗耳對
流泉

買南山

吾居四圍皆山獨南山未營一丘一壑之業
廼今新得百畝于西溪之西廢乎東西南北
所至爲泉石主人亦生人大樂事也村中愚
夫愚婦無論貧富皆勤渠馬牛夜以繼日遂
謂余是神僊吁閒固閒矣樂亦樂矣曰神與
僊則吾豈敢抑身無他累心無妄想云爾豈
人所不能而余獨行怪者乎欣然有感于是
作買南山篇

東西南北盡佳山選勝窮幽不論錢眺罷南峰遊北

手醉回東嶺淪西泉煙霞到處青
若船野老總輪閒漢樂便稱此地有神僊

白頭吟解

文君之眉如遠山芙蓉臉際秋清妍
茂陵女兒未必然一朝能使相如憐
卓氏聞之心欲死白頭吟成淚如雨
不念當鑪賣酒時溝水東西客無主
長卿謂言何足嗔十七寡居誰與親
琴心詎可挑烈婦匪日富貴忘賤貧
余生素有消渴疾欲賦美人箴往失
奔則爲妾聘則妻以色事人難永畢

中酒謝客而喜子久至因贈一首

秋來常嬾着衣巾何事蓬門剝啄頻欲避不能邀酒
伴無期還至論詩人田園瓜果清堪供林木禽魚近
自親交際似君殊坦率青山當見白頭新

子藝畏酒避客喜余過訪有作奉和 蔣灼

憐君避客謝尊壘盡日花開不浪開却爲山人重倒
甌更隰園果細斲杯金蘭白首應同契玉樹青雲幾
共陪溪鳥亦知真率意相親相伴肯相猜

花蝴蝶采蝴蝶花

飛來兩兩花蝴蝶來采雙雙蝴蝶花侍女不須紈扇
撲蘧蘧秋夢憶南華

送徐氏諸弟昆之松江訪博士二兄

書來知爾下雲間正是秋分客最閒
湖上影聯鴻鴈陣海邊城近鳳皇山
干戈離亂交游少禮樂甄陶氣運還
花萼會中如念及苕溪亦有釣舟彎

西湖見荷花間美人

白藕花開白露涼棹歌何處逝風香
逼清逼潔臨湖水宜笑宜顰映曉妝
曹子不須夸洛浦蘇堤錯認是橫塘
煙波十里城西路願逐飛雲度女牆

梅林歌六首壽大宮保胡相公

保安樓前梅樹林主人自有歲寒心
商家正欲調金

得藉爾和羹作傳霖

梅花如玉滿林香不怕庭前有雪霜漢武上林春紫
蒂獨將精白獻明王

海上年來著戰爭紫微垣裏將星明旄頭從此烽煙
息南極光搖細柳營

聖主深知卻轍賢臨軒寵命日三宣詩書禮樂真儒
將壽脈還同國脈延

馬上休夸腰鑲翁漢家飛將正英雄要知麟閣標名
處看取樓船第一功

銅柱曾標馬伏波將軍下瀨振鐃歌 大明天子玄

威遠太保尚書妙算多

石假山

繞廬無處不佳山又費囊金買石還沈土已經檀寺
劫出林猶帶蘚痕斑螺鬟掩映三千隊蟬噪參差十
八班奇友似君難甲乙論交物外拜何慙奇章公蓄
奇石以甲
乙爲
品第

燕集蔣子久宅醉中戲作

客至君嫌我到遲沿村酒債固難辭入門半醉殘棋
亂撫檻全醒短笛吹新雨乍過山更爽重陽將近菊
先知沈酣又欲吟哦去遮莫人癡子藝癡

王忠文公春暉堂燕集有贈

醉裏聽鳴榔遙將宿約償清風文杏館舊日紫薇堂
樽酒皆新具圖書尚大方開門槐樹影鬱鬱趁秋長

王維輞川有文杏館而君之先世常官翰林故云

帳中觀美人梳頭

藏春樓作

初日上垂楊因問理曉妝簪分紅縷潤髻縮綠雲香
玉映文鴛帳花明翠鳳梁文美高枕臥方索解醒湯

雙兔

爰爰雌雄兔獻自山中氓苗以白竹箱飼以綠草英
趯趯得其偶炯炯揚雙睛性狡縱未易貌馴狎不驚

藏臥臥郭子云是明月精望月或腹孕祗毫非日生
八竅能跌處三穴巧自營深林卯日遇輒稱丈人名
胡爲倦搗藥並受且罔嬰守株固彼惑忘蹄實吾情
衣褐風斯野缺吻儀豈誠孰典宗廟禮明昧供齋盛
無乃登異物麋狼列五牲詩人美炮燔嗜慾吾所輕
同媿爾何幸免同走狗烹不見毛穎徒殺身封管城
我惻爾不欲與爾長生盟韓盧龐馳逐姮娥其虧盈
那使丹竈躍常須玉杵擎再閱三千歲太白變元稹
秋風吹古桂爲爾脫離簾友之淵林間一跳還一鳴
我辭信無証南山日崢嶸當時秦少游亦有放兔行

芙蓉

秋渚敷容花的壓能詎霜安得美人采集爲君子裳
不見朱槿榮夕隕在寒塘所以楚澤心疊疊悲群芳
與內子訪西湖山中玄尼師二首

山人多野性君亦厭樊籠青鸞何日跨畫鴉此時同
不學李太白送爾尋騰空

右贈內子

誰傳乾竺法佛子在湖濱披緇樹雲淨煮茗石泉新
階前芟芻草香風斷浮塵

右贈尼師

庭山戲詠

眼底巒嶸盡小山何由移到戶庭間翠微疊疊穿花

出玄殿時時隱几禁獨愛正心并石骨休看雨簷及
風鬟吟筇遊較平安甚五嶽于今是等閒

芷蓀 一名藉姑

葉作綠燕尾花如白玉臺歲收十二實不數莢子魁
九月望日喜張汝芳至遂同徐汝存玩月因憶
汝芳已來中秋之會感往有作

中秋月食不逢君一月遐思寄碧雲湖市買舟應卓
午田家閉戶已斜曛旋簞菊醅香成醉共吳蘭言氣
轉芬莫使清光墜樓角霜寒鴻鴈正呼群

菰祥草 書帶亦草名

小小盆中草芳名最吉祥葉侵書帶細花撲筆牀香
早喜雨霽赴南山野人之約

夢裏尋山卻睡魔五更數間雨如何烏晴天氣無妨
事清興賓朋不厭多淡淡白雲收遠岫瀟瀟紅葉點
層波從禽肯失虞人信我亦扁舟載酒過

與瓊心泛廻塘采芙蓉

秋碧夫容錦繡鋪廻塘便是小西湖迎風婉婉偎霞
玉映水娟娟出藥珠少女按歌花下拍偏提送酒竹
間厨影娥池上歸來客誰把新詩寫醉圖

杜子美有
浣花醉歸

圖黃庭堅有詩

九月末旬桃花

菊花寂寞幾重陽
安得桃花滿樹芳
九月已過非月令
小春將近借春光
浪教蜂蝶爭喧日
耐可芙蓉獨拒霜
誰憊漁舟問津口
武陵源水接廻塘

借子久遊南山晚酌村舍

雨霽輕飛白鷺舟
塘南山北共遨遊
秦皇渡海留奇石
宋室邊江多古丘
撥雪稻香炊正熟
潑雲棗落酒初酉
酒熟有秋自識田家樂
遙聽唐村子夜謳

遊宋重陽女故居因登望江尖

瓦礫餘墟久顧瞻
重陽宮女舊薨檐
墨灰幾度乾坤

切香火曾經雨露霑谷口草荒遊輦道

南宋遊洞霄宮故道

山

頭雲鑲望江失從來感慨兼登眺莫訝臨風酒量添

苦雨

西風瑟瑟雨沈沈愁殺農家刈穫心我亦一丘收未得幾宵無寐攬寒衾

題洪氏孤山舊莊

記訟平泉石詩嗟韋氏莊古人同感慨今我亦淒涼
鳥識曾歌拍花疑舊舞妝獨更金碧榜斜日耀湖光

憫農

雨損復重傷農夫苦稻粱舊傳分社熟今作少年荒

賦稅軍需急飢寒世務長未蒙蠲恤詔流淚仰宵蒼

諺云分後社米谷偏天下今秋分先社四日也

夜宿桃源口聞崔生談往年官軍之擾惻然憫

之因贈以詩

避難何年自一村至今深塢號桃源不因海寇曾抄

掠却爲官兵滅戶門官兵殺一平民家七口報功草木四山惟縱

火干戈十日此空屯茂陵滌器吾憐汝知有遺經幾

卷存乃祖登賢科

永昌道中

落日停車開酒村西風寂寞獨開尊亂山啼鳥無冬

夏深塢居民自子孫水碓曉春灰竹屑野田夜燒種
禾根青牛西去靈源在枕上遙遙役夢寬

青牛山
在新城

夜燕新城彭子豫公署奉謝一首

入境驩然有頌聲葛溪不及使君清原非百里材真
屈何必三年政已成鼓角漸寒知夜永笑談殊暖鼎
陽生遲明又向青山去回首文昌無限情

文昌樓
在城南

登塔山謁雙忠許睢陽祠

莫作溪山漫浪遊忠臣廟貌此春秋執教狂虜回南
牧賴有孤城障上流將士一心非一日弟兄同死不
同丘依依柴梓親恭止何況英靈萬古留

燕集陳尉守德公署奉謝

厚德常懷陳仲弓又分墨綬佐花封
年家寥落如星散世誼殷勤此日逢
尊酒淨涵依砌竹琴牀閒對隔溪峰
聖明列岳還相待六牧爰知有舊蹤

贈別莆田柯君悅

憲節通家久離群孤城落日忽逢君
擁爐斗閣心初合把酒琴堂夜欲分
海上祗今惟尚武客中誰與共論文
明朝鴻鴈重南北迢迢青山盼碧雲

送王先生傳周藩

雨雪霏霏楊柳疎蕭然行旆逐微書
幾年赤縣曾飛

爲此日王門更曳裾太傅長沙非遠謫諸生類本益
離居山來帝子崇文學西邸弘開卽石渠

送方少參之左江蓋潯陽廼家君駐節之地扁
其堂曰韋成南服故及之

遠辭畫省鎮窮邊使節遙臨自九天文德既來宜簡
靜武功已定見蕃宣路從梅嶺風霜入水繞潯江雨
露偏南服阜成尋舊蹟我翁衣鉢賴君傳

大方伯胡公見惠詩文諸集答謝一首

環滁山水帝王畿曾見名賢應紫微西北金湯聞
豹畧東南屏翰仰龍旂清如胡質心猶畏文有康侯

士所依衣鉢若容傳上乘秋風萬里附雄飛

大夫六句上壽志喜

喬木南山仰大椿高堂未白慶嚴親敢誇金紫垂三
組曾竭忠貞事一人聖曆有年周甲子帝居無
過泰庚申自慚祿養何能報載舞斑衣六百春

大司徒周公留燕北關借樂亭奉謝一首

獨樂誰能與衆偕分司自有逸群材濟川舟楫惟公
任接席圖書爲我開柏署晝寒初鎖印水亭日落正
銜杯空山回首情何限遙見郎星燭上台

咏精衛銜石填海

溺死非正命不吊味何居既稱炎帝女安得臨深危
微生苟不珍含冤復鬱爲淪精入羽族呼名良可悲
西山石齒齒東海波瀾瀾銜血未易乾填恨正難治
飛飛自古今啾啾徒歲時人或賞專精韓退之詩人
皆譏造次我
獨賞我獨哂狂癡閨門千金軀玉壺慎莫虧所以古
貞女保傳不暫離魯姬符不至守節沒臺涯曹娥屍
不出甘心喪江渚未聞雙烈竟遷怒及馮夷嗟哉無
知鳥報讐將誰欺

萬里長江圖

丈夫有廣居不繪小山水素練五六尋長江千萬里

酒船浮謫僊
崑崙隱高士
祇愁雲雨生
秋濤黑龍起
酬似雲上人

我亦嶽崎歷
落人高僧不
如往來頻虞
翻骨體何須
媚清豔才華
儘是新湖上
雨同山上月
寺中秋與客
中春隨方解
得枯禪味未
必能言盡法
塵

龜趾

一作刺見續漢書劉玄傳掘龜趾而食今吳人呼音如茅薺

車龍磔翠鬚
小兒蟠紫拳
可以充移腹
千載懷劉玄
題唐棣花圖

終鮮悲相輝
偏其反階下
我亦勞遠思
對之傾一尊
橄欖

青子產南州苦盡甘味足勝含雞舌香尤藉解酒毒

黃梅花

種與梅全別清香酷似梅色遲黃菊並心借紫檀開

僧訝金爲磬蜂疑蠟作臺

蠟梅一名磬口梅

一枝明月下如

向漢宮來

西湖用腰橋二韻

佛國城西路不遙錢塘風物信天驕月中湖作珠縣
領雪後山爲玉繫腰花發尚疑蘇小宅馬嘶逕度段
家橋休論南宋興亡事二百年來樂聖朝

題江都拜相卷

河汾甘守道三載屈青氈身教原無隱心燈孰與傳
梁王能好士董相共稱賢歲暮征車發遙瞻郢樹烟
答徐弟之翁

八十三翁矍鑠哉新詩誰與細評裁因思暖手雞頭
肉魯醉空心鳳嘴杯間闊總教如日遠起居何事只
書來品品歲晚多清適留着梅花敵面開

敵面方言
當面也

去松樹藤

蒼松一樹正凌霄碎蔓長藤繞萬條爲爾斧斤都剝
削挺然霜雪見孤標